



## ***Komunikadu Imprensa***

### ***Tribunál Distritál Suai***

***21 Marsu 2014***

#### **Tribunál kondena arguidu sira ba kazu tentativa omisídiu no omisídiu agravadu ho pena prizaun tinan 24 too tinan 28**

Iha 18 Marsu 2014, Tribunál Distritál Suai liu husi julgamentu movel iha Distritu Bobonaro kondena arguida Augusta Paulina Meakho pena tinan 24 prizaun, arguidu Laurentino Mau ho pena prizaun tinan 25 no arguidu Patricio Romali kondena ho tinan 28 prizaun.

Tribunal prova katak arguidu sira prátika krime omisídiu agravadu no tentativa omisídiu hasoru vítima na'in 8 ne'ebé rezulta vítima na'in 6 mate kedas iha fatin akontesimentu no na'in rua seluk, sofre kanek todan. Kazu ne'e akontese iha 25 Outobru 2012, iha Atabae, Distritu Bobonaro.

Aleinde ne'e, iha mós arguidu na'in rua seluk, Evanjelino Tavares no Vitor Soares da Graca ne'ebé alegadu involve iha kazu ne'e, maibe tribunál absolve tanba tribunal la hetan prova sufisiente ba sira nia involvimentu iha krime ne'e.

“*Krime omisídiu (oho-malu) hanesan kazu ne'ebé grave teb-tebes, tanba hasai ema seluk nia vida. JSMP haksolok hodi haree tribunál kondena arguidu sira ho pena ne'ebé ekuilibriu ho sira nia hahalok. JMSP hanoin katak nunka iha razaun ne'ebé justifikável hodi termina ema seluk nia vida,*” dehan Luis de Oliveira Sampaio, Diretór Ezekutivu JSMP.

JSMP hein katak kondenasau ne'e bele eduka ita nia sosiedade atu la hatoman-an rezolve problema ho sasan kroat iha sosiedade nia leet, satan aktu rezulta ema lubun ida lakon sira nia vida iha tempu hanesan. Reflete ba fenomena krime omisídiu ne'ebé buras teb-tebes iha fatin hot-hotu, JSMP rekomenda ba entidade estada atu halao kampaña konsensializasaun no edukasaun sivika ne'ebé klean no regular kona-ba importânsia husi ema seluk nia vida no aprosimasaun ba rezolusaun konflitu iha sosiedade.

Iha jugalmanetu tribunál deskobre katak arguida Augusta no Laurentino hanesan feen ho laen hamutuk ho sira nain rua nia oan, Patricio halo planu hodi oho vítima sira.

Iha audiénsia julgamentu arguidu sira konfesa totalmente ba faktus hotu no hatudu nia arependementu ba hahalok ne'ebé sira komete. Arguidu sira mós deklarata katak sira dame malu ona ho vítima sira ne'ebé sei moris liu-hosi sira nia kustume. Deklarasaun ne'e hetan koonfirmasaun mós husi vítima nain rua ne'e.

Antes ne'e, Ministériu Públiku akuza katak iha 25 Outobru 2012, mais umenus iha tempu kalan, arguidu sira falun oin metin, tama ba iha vítima sira nia uma laran ho katana taa vítima sira no rezulta vítima na'in 6 mate kedas iha fatin akontesimentu no nain rua seluk hetan kanek todan.

Motivu akontesimentu tanba kestaun hadau malu riku soin, entre parte arguidu/ kodenadu sira ho vítima ne'ebé ho estatuto nu'udar feen kiik no feen boot.

Relasiona ho aktu ne'e, Ministériu Públiku akuza arguidu sira kontra artigu 139 Kódigu Penál kona-ba omísidiu agravadu kónjuga ho artigu 23 Kódigu Penál kona-ba tentativa.

Prosesu julgamentu akordaun ne'e deriji husi representente juís kolektivu, Dr.Costãncio Barros Basmery, Ministériu Públiku representa husi Dr. Antoni oda Silva Tavares, no arguidu sira hetan akompañamentu husi Dr.Manuel Amaral (estajiudu) husi Defensoria Públiku.

Aleinde kazu ne'e, tribunal móvel ne'e, mos preside leitura sentensa ba kazu krime seluk hanesan kazu infantisidiu, abuzu seksuál ba menor, no abuzu konfiansa ne'ebé prezide husi juis hanesan.

Atu hetan informasaun kompleitu, favor kontaktu:

Luis de Oliveira Sampaio  
Diretór Ezekutivu JSMP  
Diresaune-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
Telefone:3323883 | 77295795  
Website: [www.jsmp.tl](http://www.jsmp.tl)  
Face book: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl